

INUIT ATAQATIGIIT

INATSISARTUNI



Nuuk, 13.01.2012

Inatsisartut Suleriaasianni § 37 naapertorlugu matumuuna imattumik Naalakkersuisunut apeqquteqarpunga:
(Inatsisartuni ilaasortaq Naaja Nathanielsen, Inuit Ataqatigiit)

Apeqqut:

Piffissami aggersumi Nunatsinni akissaatit sulinermilu atugassarititaasussat allat isumaqatiginninniutigineqalertussanngorpata, Naalakkersuisullu kissateqarnerat malillugu sulisitsisut sulinermillu inuussutissarsiuteqartut akornanni pingasoqiusamik isumaqatiginninniarnarit aallaartinneqartussanngorpata, meerartaarnermut atatillugu aningaasaateqarfiliorsinnaanissap isumaqatigiinninniutigineqarsinnaanera Naalakkersuisunit pilersaarutigineqarpa?

Tunggavilersuut:

2012-ip upernarialernerani sulisitsisut sulinermillu inuussutissarsiuteqartut kattuffiisa arlallit akornanni akissaatit sulinermilu atugassarititaasussat isumaqatiginninniutigineqarlutillu aalajangersorneqartussaapput, tamatumani pisortani aammalu suliffeqarfinni namminer-sortunit ingerlanneqartuni sulisut atugassarisaat pineqarlutik.

Meerartaarnermut atatillugu aningaasaateqarfiliornissaq ukiuni kingulliunerusuni arlaleriarluni oqaluserineqartarsimavoq, tamannalu kingullermik Inatsisartut 2010-mi ukiakkut ataatsimiinneranni pivoq (UKA 2010/38). Taamani Inatsisartut aalajangiiffigisassaattut siunnersuut imaattumik oqaasertaqartoq akuersissutigineqarpoq:

“Sulisartut tamarmik ullormusiaqartitseriaatsimit atuutereersumit aningaasaqarnikkut pitsaannerusumik atugassaqartinneqarnissaat qulakkeerniarlugu meerartaarnermut atatillugu aningaasaateqarfimmik Nunatsinni pissutsinut naleqqusakkamik pilersitsinissamut periarfissamik misissuisoqarnissaa pineqartumullu ajornerulersitsinnginnissaq siunertarlugu sulisartunik sulisitsisunillu Naalakkersuisut isumaqatiginninniarnissaat pillugu Inatsisartut aalajangiiffigisassaattut siunnersuut.”

Siunnersuut suliarineqarmat Naalakkersuisut taamani imaattunik oqaaseqaateqarput: “Naalakkersuisut tunggaviusumik isumaqarput suliassat taamaattut akissatit pillugit isumaqatiginninniarnernut ilanngullugit sulisitsisut sulinermillu inuussutissarsiuteqartut kattuffiisa akornanni isumaqatiginninniutigineqarsinnaasariaqartut, **aammalu Naalakkersuisut isumaqarput meerartaarnermut atatillugu aningaasaateqarfiliorsinnaanissaq sulisitsisut sulinermillu inuussutissarsiuteqartut akornanni pingasoqiusamik isumaqatiginninniarnarit aqutigalugit pilersinneqarsinnaanissaa pingaruteqartoq.**”

Naalakkersuisut siulittaasuata ukiortaami oqalugiaataani kingullermi aamma oqaatigineqarpoq akissaatit sulinermilu atugassarititaasussat isumaqatiginninniutigineqalerpata sulisitsisut sulinermillu inuussutissarsiuteqartut akornanni pingasoqiusamik oqaloqatigiinnissaat Naalakkersuisunit siunnerfigineqartut. Tamatumani meerartaarnermut atatillugu aningaasaateqarfiliorsinnaanissaq isumaqatiginninniarnerni qaqinneqarsinnaasoq takorloorneqarsinnaavoq. Matumani ilanngullugu Sermitsiaq nr. 01, 6. januar 2012-imi allaaserisaq “Oqaloqatigiinnissamut Kuupik qaaqqusivoq” innersuussutigineqassaaq.